

ALAHADY II - PAKA - TAONA A 2023



"Sambatra izaytsynahita ka nino".

Ry Kristianina havana, izao Alahady manaraka ny Paka izao no antsoina amin'ny teny latina hoe "Quasimodo". Mbola Paka ihany koa ho antsika satria ny Paka dia tsy inona fa i Kristy nitsangan-ko velona. Ity Alahady faharoan'ny Paka ity no andrenesantsika ny Evanjely mikasika an'i Md Tomà izay nanambara hoe "Tompoko sy Andriamanitra". Tahaka an'i Md Tomà isika tsirairay avy rehefa miaiky ny fahalementsika ka manaiky an'i Kristy sy miaina ny famindrampon'Andriamanitra.

Nantsoin'i Papa Md Joany Paoly II ho Alahadin'ny Famindram-pon'Andriamanitra ity Alahady faharoa amin'ny Paka ity nanomboka tamin'ny 30 aprily 2000, andro nananganana ho olomasina an'i Mb Faustine izay nambaran'ny Fo masin'i Jesoa hampibaribary ny famindram-pon'Andriamanitra.

Vakitenyl : Asa 2, 42-47
Tononkira : Sal. 117,
Vakitenyll : 1 Pi. 1, 3-9
Evanjely : Jo. 20, 19-31

Alahady faharoa amin'ny fankalazana ny Paka ny Alahadin'ny famindram-po satria i Kristy nitsangan-ko velona no mampibaribary fa famindram-po tokoa Andriamanitra.

Ny lohahevitra atolotry ny Eglizy amintsika androany amin'ny alalan'ireo tenin'Andriamanitra dia azo fintinina hoe "Mifalia isika mianakavy, mifalia isika olo araiky jiaby ary aoka hifankatia ao amin'ny Tompo fa be famindram-po Izy". Ao amin'izao andro iatrehantsika krizy izao no manakoako ho antsika EOV izany hafatra manokana izany ary indrindra miroso hatrany isika matrika ny Sinaody. Efa naverimberintsika fa ny toe-panahin'ny sinaody dia isika miombona miara-dia ary amin'izao dingana faharoa dia mitaky izany fiombonana sy fiarahan-dia izany ahafahantsika miaro sy mikokolokolo ny tontolo iainana.

Ry Kristiana havana, manenika ny fontsika ny hafalian'ny Paka, mirehidrehitra ao amin'ny fontsika, tahaka nampirehidrehitra ny fon'ireo mpianatra tany Emaosy raha nihaona tamin'i Kristy izy ireo.

Hafaliana mirehidrehitra ao am-po zaraina amin'ny hafa, izany no mahatonga antsika hifankatia hanambara ny vokatry ny Paka dia ny fiadanana. Isika miara-paly ao anatin'izany fiadanana sy fihavanana vaovao nentin'i Kristy sy ny fitiavana nampianariny izany dia ny fanompoana, isika mifankatia, isika mifanasoa, io no Paka ho antsika.

Paka tokoa ny fiainantsika raha asiantsika Aleloia. Aoka hifankatia isika raha tiantsika hasiana Aleloia ny fiainantsika. Misy Aleloia ny fiainantsika raha misy ny hafaliana vokatry ny fifankatiavana.

Ry Kristianina havana, izany no manosika antsika araka ny voalazantsika tamin'ny taonan'ny famindrampo mba ho "chappelle" famindrampo-po isika tsirairay avy. "Chappelle" isika raha onenan'Andriamanitra ny fontsika ka tia manompo ny hafa, manompo ireo manodidina antsika anisan'izany ny tontolo iainana izay tokony hotandrovina sy hokolokolina ary hohatsaraintsika.

Mbola izany no halalinintsika sy hamafisintsika amin'izao Sinaody izao ka hahatonga antsika ho Tabernakla velona. Aoka àry isika hanahaka an'i Masina Maria hahay handray an'i Jesoa ka hitondra azy amin'ny manodidina ho Misionera, ho Misioneran'ny Famindrampo.

Mivelona ny famindrampo-pon'Andriamanitra isika raha malemy fanahy, "chappelle" famindrampo-po velona isika, Tabernakla velona tahaka an'i Masina Maria raha malemy fanahy eoamin'ny tontolo manodidina antsika sy mandray an-tanana eo anivon'ny fianakaviana eglizy kely, ny eglizy fiombonana, ny eglizy iraka, ny eglizy fototra.

Hamafisin'ny vakiteny voalohany ao amin'ny Asan'ny Apostoly izany : "Nazoto ireo mpino tamin'ny fampianaran'ny Apôstôly sy ny famonjem-pivoriana, ary tamin'ny famakiana ny mofo sy ny fivavahana rehetra". Nazoto nihaino ny fampianarana sy nandalina ny finoany ny Apostoly, niara-belona tamin'i Kristy izy ireo sy nihaino Azy ka ohatra velona ho antsika izany ry krsitianina havana fa indrindra isika manao Sinaody izao. Mila mifampitraotro isika. Mila mihaona. Mila miara-dia ary indrindra mifampitandregny, mifampihaino fa aza manao tahaka ny Mpianatra tany Emaosy manao izay manao ny saim-pantany. Soa fa nananatra mafy azy ireo Jesoa.

Ho fanehoantsika ny vokatry ny Paka dia aoka isika mba hazoto handalina ny finoantsika tahaka an'ireo Apostoly, hiatrika ny fivoriana rehetra fanomana ny Sinaody sy ny Kongresy Eokaristika. Efa misy rahateo ny ezaka vitantsika satria an-kafaliana, an-karavoana no ilazana amintsika fa vita ny Katesizy fa ny fanontana azy ho boky entina ampisaina no sisa. Tsy mora ny manao zavatra. Aoka isika hazoto hihaino ny fampianaran'ny Eglizy ary hazoto hamonjy ny fivoriana na ao anatin'ny fikambanana masina, na ny firohotana, na any amin'ny vaomiera any amin'ny eglizy fiombonana. Aoka hanatanteraka an'izany isika satria izany no fijoroana ho vavolombelona manompo an'Andriamanitra. Aoka ho tahaka an'ireo Apostoly isika hazoto hamonjy ny fivoriana sy hivavaka.

Entanin'ny fifankatiavana marina isika ka hifampizara ny manta sy ny masaka tahaka ny Apostoly, mandray an-tànana ny fiainan'ny eglizy toy ny fanatanterahana hasim-pinoana. Hitantsika fa ny anarana no tsy mitovy fa fanaon'ny Eglizy ny fandraisana an-tanana, ny fanatanterahana ny hasim-pinoana. Indrisy raha ny tatitra avy amin'ny filankevitra ekonomika eto amin'ny diosezy dia 6% ihany no nanao teo. Mila ezaka isika.

Aoka ho tsapantsika fa manome hasina ny maha Katolika antsika isika EOv vita batemy amin'ny alalan'ny hasim-pinoana mba ho Paka isan'andro ny fiainantsika satria mandray an-tànana ny finoantsika.

Mampianatra antsika i Md Piera ao amin'ny vakiteny faharoa mba hanambara ny fanantenantsika amin'ireo mpiara-belona amintsika isika, izany ny vokatry ny Paka " Isaorana anie Andriamanitra, Rain'i Jesoa Kristy Tompontosika, izay niteraka antsika indray, araka ny haben'ny famindram-pony, noho ny fitsanganan'i Jesoa Kristy ho velona, ho amin'ny fanantenana velona, hahazo ny lova tsy mety simba, tsy misy pentina, tsy mety levona ". Noho ny hasin'ny Fanahy masina, noho ny famonjena entin'i Kristy dia feno fanantenana isika. Raha ny olon'izao tontolo miatrika izao krizy izao very fanahy mbola velona satria tsy misy « repères » isika kosa manana an'i Kristy. Kristy nandresy ny ratsy. Kristy Famindram-po, Mpampihavana, Kristy manavao ka zary Fahariana vaovao.

Kristy velona no fanantenana ho antsika ka hahatonga antsika hahazo ny lova tsy mety simba na levona. Miaraka amin'izany fanantenana izany isika no manatanteraka ny adidy sy ny andraikitra fanompoana eo amin'ny Eglizy kely fianakaviana, Eglizy fiombonana, Eglizy fototra, Eglizy iraka, eo amin'ny fikambanana sy vaomiera misy antsika. Ho kristianina velona manambara ny fanantenana an'i Kristy isika tahaka an'i Md Tomà sy Lucien Botovasoa ka vonona mandrakariva na dia eo aza ireo fijaliana mety hitranga, na dia eo aza ny fanenjehana, na dia eo aza ny sedra. Izao alahady "Quasimodo" izao dia ahatsiarovana ny namonoana an'i Lucien Botovasoa ho martyry. Avy namory ny Olo Jiaby izy na kristianina na tsy kristianina ka nasainy hifankatia hivelona ny fihavanana sady kristianina no malagasy. Mila izany izao androntsika izao. Nijoro vavolombelona tokoa ary nanambara tamin'ireo namono azy fa mamela ny helony ary tahaka an'i Tomà anio : Tompo sy Andriamanitra i Jesoa.

Enga anie isika hijoro hanambara amin'ireo manodidina antsika fa i Kristy nitsangan-ko velona dia mpiara-dàlana amintsika, Izy no Tompo sy Andriamanitsika. Omen'i Jesoa antsika ny fanahiny ka hanana ny fiadanany isika sy hanana ny herim-po ilaina rehetra ka hanambara amin'ireo manodidina hoe : efa nahita ny Tompo tokoa izahay.

Enga anie izao fankalazantsika ny Alahadin'ny famindram-po, izay mbola ao anatin'ny Paka izao, hanampy antsika hiroso lalindalina kokoa amin'ny fiainam-pinoana. Mpiara-belona amintsika i Jesoa ka matoky Azy isika. Koa enga anie hoentanin'ny fanahiny tokoa isika hanambara Azy eo amin'ny fiainantsika.

Ry Jesoa zokinay ô, enga anie hisy fihavaozana ara-panahy tokoa izahay ka ny famindram-ponao no hanenika anay. Ho feno hafaliana sy fanantenana izahay eo amin'ny fiainanay andavanandro ary na dia malemy aza izahay, na dia fatra-pisalasala aza izahay, na dia eo aza ny sedra maro dia herezo ho tahaka an'i Md Tomà sy Lucien Botovasoa hiaiky fa lanao tokoa no Tompo sy Andriamanitra ka vonona hanambara izany na hatramin'ny farafefon'ainay aza. Amin'izay dia hahay handray an-tànana ny fiainanay miaraka Aminao izay nitsangan-ko velona izahay. Masina Maria Renin'ny Famindram-po ampianaro izahay halemy fanahy ka vonona hifandray amin'ny rehetra hikatsaka ny soa iombonana, hifanasoa, hifampitsimbina anatin'ny fahamarinana. Md Josefa Ray Mpiaoron'ny Eglizy arovy tokoa izahay mba tsy ho lavo amin'ny fakam-panahin'ny fitiavan-tena ka hanilikilika. Mivavahà ho anay mba hanjaka aminay ny famindram-po ka hahay hanampy ny hafa izahay fa indrindra ireo misedra ny mafy, hahay mifanaja izahay, ho vonona miaro ny aina. Amen

Mompera Arseveka Mgr Benjamin Ramaroson